

Na osnovu člana 17. Zakona o Vijeću ministara Bosne i Hercegovine ("Službeni glasnik BiH", br. 30/03, 42/03, 81/06, 76/07, 81/07, 94/07 i 24/08) i člana 11. Zakona o finansiranju institucija Bosne i Hercegovine ("Službeni glasnik BiH", br. 61/04 i 49/09), Vijeće ministara Bosne i Hercegovine, na 154. sjednici, održanoj 29. juna 2011. godine, donijelo je

**ODLUKU**  
**O PRIVREMENOM FINANSIRANJU INSTITUCIJA BOSNE I HERCEGOVINE I**  
**MEĐUNARODNIH OBAVEZA BOSNE I HERCEGOVINE ZA PERIOD**  
**JULI - SEPTEMBAR 2011. GODINE**

**Član 1.**

**(Predmet odluke)**

Ovom Odlukom odobrava se privremeno finansiranje institucija Bosne i Hercegovine i međunarodnih obaveza Bosne i Hercegovine za period juli - septembar 2011. godine.

**Član 2.**

**(Visina sredstava za privremeno finansiranje)**

Privremeno finansiranje institucija Bosne i Hercegovine i međunarodnih obaveza Bosne i Hercegovine za period iz člana 1. ove Odluke utvrđuje se do iznosa ukupno usvojenih sredstava Budžeta institucija Bosne i Hercegovine i međunarodnih obaveza Bosne i Hercegovine na nivou jedne četvrtine sredstava u usvojenom budžetu za 2010. fiskalnu godinu u iznosu do 341.472.250,00 KM.

**Član 3.**

**(Raspored prihoda po bužetskim korisnicima i vrstama rashoda)**

- (1) Raspored prihoda po budžetskim korisnicima i vrstama rashoda za period iz člana 1. ove Odluke vršit će se na nivou jedne četvrtine sredstava u usvojenom Budžetu za 2010. fiskalnu godinu, uključujući i rezervisanja iz člana 3. tabela 3. stavka 99992 pozicija 1 – tekuća rezerva.
- (2) U periodu važenja ove Odluke primjenjivat će se Odluka o prenosu ovlaštenja predsjedavajućem i zamjenicima predsjedavajućeg Vijeća ministara Bosne i Hercegovine za interventno korištenje budžetske rezerve („Službeni glasnik BiH“, broj 11/10) i to kvartalno u visini od jedne četvrtine godišnjeg iznosa iz člana 2. stav (1) navedene Odluke.
- (3) Budžetski korisnici ne mogu započeti nove ili proširene programe i aktivnosti dok se isti ne odobre u Zakonu o Budžetu institucija Bosne i Hercegovine i međunarodnih obaveza Bosne i Hercegovine za 2011. godinu.
- (4) Za nove institucije formirane tokom 2010. godine, mjesečni iznos sredstava za finansiranje odobrava Ministarstvo finansija i trezora Bosne i Hercegovine u skladu sa iznosima odobrenih sredstava iz Budžetske rezerve Budžeta institucija Bosne i Hercegovine i međunarodnih obaveza Bosne i Hercegovine za 2010. godinu, uzimajući u obzir potrebu prilagođavanja strukture budžeta realnim uslovima njihovog funkcionisanja.
- (5) Na osnovu Odluke o preuzimanju poslova, objekata, sredstava za rad i zaposlenih između Ministarstva sigurnosti Bosne i Hercegovine, Državne agencije za istrage i zaštitu i Direkcije za koordinaciju policijskih tijela Bosne i Hercegovine ("Službeni glasnik BiH", broj 94/10) u periodu juli -septembar 2011. godine odobrava se za privremeno finansiranje Direkciji za koordinaciju policijskih tijela Bosne i Hercegovine iznos do 6.300.000,00KM.
- (6) Finansiranje Ministarstva sigurnosti Bosne i Hercegovine i Državne agencije za istrage i zaštitu bit će srazmjerno umanjeno u skladu sa sredstvima iz stava (4) ovog člana.

#### **Član 4.**

##### **(Višegodišnji projekti)**

Neurošena sredstva za višegodišnje projekte, a koji su usvojeni u budžetima prethodnih godina, prenose se u skladu sa članom 14. Zakona o finansiranju institucija Bosne i Hercegovine ("Službeni glasnik BiH", br. 61/04 i 49/09).

#### **Član 5.**

##### **(Servisiranje vanjskog duga)**

Izmirenje obveza na osnovu servisiranja vanjskog duga vršit će se u skladu sa planovima otplate.

#### **Član 6.**

##### **(Provođenje odluke)**

- (1) Provođenje ove Odluke vršit će se u skladu sa odredbama i procedurama utvrđenim u Zakonu o Budžetu institucija Bosne i Hercegovine i međunarodnih obaveza Bosne i Hercegovine za 2010. godinu ("Službeni glasnik BiH", broj 103/09).
- (2) U periodu privremenog finansiranja iz člana 1. ove Odluke, prioriteta plaćanja utvrđeni su članom 18. Zakona o finansiranju institucija Bosne i Hercegovine.

#### **Član 7.**

##### **(Stupanje na snagu)**

Ova Odluka stupa na snagu danom donošenja i objavljuje se u "Službenom glasniku BiH", a primjenjivat će se od 1. jula 2011. godine.

VM broj 94/11  
29. juna 2011. godine  
S a r a j e v o

Predsjedavajući  
Vijeća ministara BiH  
Dr. Nikola Špirić